



栗谷全書一

辭賦詩

~ 16
2426
1

卷二十七



和
2426
1-37

栗谷先生全書修正凡例



一先生集有詩集一卷文集九卷續集四卷外集
 四卷蓋詩集與文集刊出在於 萬曆辛亥而
 詩集則朴守菴枝華諸公所選文集則牛溪先
 生所定而其分類編次多出於先生門人朴公
 汝龍諸人之手詮次鮮法又多缺而不備故玄
 石以是病之續集外集鱗次而成焉一主文集
 草本草本先生仲兄璠所錄寫凡九卷而且廣聚海陽臨瀛坡
 山及當時親舊子孫家所藏片言一作而編入
 之故或不無不分早晚博取不精之歎焉尤菴
 俱病於先後集以不能一番釐正為恨云今適

書院所在板本朽剝多缺早晚須將改刊故茲依尤菴遺意通詩文續外四集滾合爲一焉

一詩文續外四集既合而爲一又依二程全書易傳例并取先生所著如聖學輯要擊蒙要訣諸書錄之改名之曰全書又次附錄於末

一詩集初則分體類會別爲一杏而非朱子大全及諸家文集之體故一從年條編次間有年條未甚分明者亦考其時世辭意而附之合而爲一通

一先生文集非諸家詞章文字之比一以明道學關治體有補於世教者爲主少時漫戲吟詠及

科場程文之類多刪去

一與退溪牛溪二先生論學書札間附二先生書以便考證

一劄啓全文之載於日記而疊出於集中者亦皆刪去院府啓辭無甚關係者亦從刪定焉

一先生答門生問及諸家撰述中關於先生平日言語者今皆哀集名之以語錄置附錄之前以倣二程全書外書例而太極問答一篇則尤菴以爲出於宋龜峯故不敢收入

一臨瀛所刊先生年譜乃尤菴所編而其時鄭進善以杆城倅臨歸刊出工役甚急故尤菴亦

以恩率不盡精為恨其後玄石錄出誤錯處為年譜考證質之於允菴則允菴許以更為勘定玄石又為別本一件置諸續外兩集之下今依允菴遺意參考兩本改正誤錯處編成而閒以他事之不備者添入焉

一附錄中年譜行狀碑誌表記諸文字外又以諸家記述雜錄續入下端以倣紀譜及他集遺事之例前後辨誣文字撮其要語又附於其後

栗谷先生全書總目

卷之一

辭

賦

詩上

卷之二

詩下

卷之三

疏劄一

卷之四

疏劄二

卷之五

疏劄三

卷之六

疏劄四

卷之七

疏劄五

卷之八

啓

議

卷之九

書一

卷之十

書二

卷之十一

書三

卷之十二

書四

卷之十三

應製文

序

跋

記

卷之十四

說

贊

銘

祭文

雜著一

卷之十五

雜著二

卷之十六

雜著三

卷之十七

神道碑銘

墓碣銘

卷之十八

墓誌銘

行狀

卷之十九

聖學輯要一

卷之二十

聖學輯要二

卷之二十一

聖學輯要三

卷之二十二

聖學輯要 四

卷之二十三

聖學輯要 五

卷之二十四

聖學輯要 六

卷之二十五

聖學輯要 七

卷之二十六

聖學輯要 八

卷之二十七

擊蒙要訣

祭儀鈔

卷之二十八

經筵日記 一

卷之二十九

經筵日記 二

卷之三十

經筵日記 三

卷之三十一

語錄 上

卷之三十二

語錄 下

卷之三十三

附錄 一

卷之三十四

附錄 二

卷之三十五

附錄 三

卷之三十六

附錄 四

卷之三十七

附錄 五

卷之三十八

附錄 六

栗谷先生全書卷之一目錄

辭

浴沂辭

祭湘靈辭

賦

理一分殊賦

畫前有易賦

次王

天使

敬民

箕子廟賦韻

并序

詩

花石亭

偶興二首

出東門

途中

望寶蓋山

山中

楓嶽贈小菴老僧 并序

萬瀑洞

楓嶽記所見

松蘿菴

楓嶽登九井看日出

與山人普應至豐巖李廣文 之元 家宿草堂

山中四詠

偶成

向臨瀛題祥雲亭

燈下看書

白川邊酌月

送李可謙 增 遊頭流山

立馬羊腸回望伽倻山

神龍圖

次林石川 憶齡 韻

寄呈石川

次李承旨 文健 默齋吟韻

詠四皓三首 見瓊言

自星山向臨瀛

過禮安謁退溪李先生混仍呈一律見瓊言

奉次退溪先生寄示韻二首見瓊言

泛菊

贈山人智正

龜峯下訪李司評之蕃

龜峯草堂風雨徹曉

降福寺石佛

次靈熙軸韻

催詩雨

詠菊

入玉溪洞

宿鳥嶺

趙公保橫家偕李汝受山海諸公飲

與諸公會

與汝受往李景魯希參家詠懷

挽黃孤山耆光

坡山奉呈聽松成先生守琛

至夜書懷

送李士亭之蕃還開天

送山人敬悅之香山

上山洞

次崔主簿 益齡 漁翁韻

贈參寥上人二首

平丘驛遇雨

哭聽松先生

釋褐登龍門

李伯生 純仁 諸君出餞次崔嘉運 慶昌 韻

題烏原驛三首

陽德縣次韻

送尹子固 根壽 赴京

灞橋晴雪

天馬

臨河歎

明宗大王挽

次松都太平館華使韻十首

箕子殿

鴨江船上別義州牧伯郭景高 嶂

次睦思可 詹 杏山客館韻

次思可望長城韻

次思可聞諸公登城觀軍容韻

撫寧縣遇回還謝 恩使

次思可三叉河韻

次思可送別進賀使先行韻

通州途中

次思可朝 天韻

次金元瑞玉河吟韻

次元瑞卽事韻

次思可登天壇韻

在燕京見仲氏詩次韻

燕京途中寄舍弟

押馬官村公挽

未平東郊次思可韻

次思可留前屯衛韻

清節祠

龍灣酒席贈主倅郭景高兼示同行友人

鄭季涵激奉使湖南余有關東之行臨別賦贈

再遊五臺山石澗踏雪

遊南臺西臺中臺宿于上院

題老僧詩軸

有僧惟命求詩甚苦走書以贈

金剛淵

重遊月精寺

將入內山遇雨

贈山人

次山人詩軸韻

題處均軸

書安定樓

雲交驛

無盡亭下乘月艇

沿流坐石研墨于巖上題詩記事

重遊楓嶽將入內山遇雨

贈山人雪衣

新晴遊通德山

書院別諸友

原城酒泉縣江樓夜坐

蓮池島上小閣崔監司景肅題設酌

次李達韻

復用前韻答景肅

舟中寄景肅用前韻

次韻別李達

過魯谷悼表叔洪上舍浩贈表兄士俊

過上山洞忽憶舊事因感有作

神勒寺東臺夜坐用汝受韻

將發神勒寺二首

過越溪棧宿邨舍有懷兄弟

斗尾十詠

有僧求詩次退溪韻

次洪忍齋 暹 淳熙院韻

贈沈景混 長源 二首

題九拙菴上梁明府 喜



栗谷先生全書卷之一

辭

浴沂辭

春風兮習習春日兮遲遲我服既成兮我友同遊瞻
彼沂水兮浴乎清漪振余衣兮彈余冠風一陣兮於
舞雩觀物化兮詠而歸達一本兮通萬殊仰天兮俯
地魚躍兮鳶飛動華已逝兮吾誰與歸樂彼杏壇兮
爰得我師

祭湘靈辭

擇良辰兮齋余心薦香火兮邀帝女蘭為肴兮玉為
醴籩豆整兮禮有序香煙起兮引仙馭風為馬兮雲

為車山靈前導兮水神後隨
嬪御粲粲兮飄輕裾鑿
余誠兮享余奠庇我福我兮無窮
期禮既終兮樂亦
闕歌一曲兮送神歸帝駕南巡兮
竟不回山高水闊
兮倘相逢留神兮不可得愁煙慘
慘兮迷江楓廟宇
清肅兮厥位吉神庶幾兮無我
數遺思皇英兮撫遺
迹竹上斑斑兮淚痕晞

賦

理一分殊賦

仰玄覽乎混淪兮俯冥觀乎磅礴
窮細縕之化源兮
極羣彙之至蹟廓遊心於物初兮
悟萬殊之一本俶
太虛之無朕兮泯聲臭於混沌
一生兩而之四兮闔

與闢其相因爰成象而效法兮
泐藏用而顯仁分一
光於晝夜兮日月昭乎其迭曜
散一聲於大塊兮萬
籟調刁於衆竅一元之往復舒
慘兮序四時而錯行
一氣之屈伸消長兮判鬼神於
幽明矧林叢之品類
兮賦一命而受形同成器於橐
籥兮若無間於通塞
然偏正之既殊兮又區別於動
植雖性命之各正兮
夫孰非太和之化醇雖統體之
渾然兮又豈非粲粲
而有倫懿聖后之首出兮誕
範圍而彌綸洞惟明於
大本兮揭達道而教人噫彼
民縱曰同胞兮愛莫先
於親親噫彼物縱曰吾與兮
務莫急於仁民老吾老
而立愛兮孝克被乎無垠長
吾長而立敬兮順斯達

於率土羌善推而有序兮孰近遺而遠取始不出乎
一家兮終化被乎草木既合德於元妙兮豈物我之
有隔固天秩之不紊兮豈本末之相錯何曲見之有
作兮欲舉一而廢百或窺本於恍惚兮或逐末於形
器彼索隱昧乎物情兮恒痼心於不貳小太山於秋
毫兮哂莊生之詭異欲以德而報怨兮嗤老氏之倒
施徒想像乎理一兮若有田而不治彼淺量昧乎物
理兮局親疎而騁私窘室廬而無空虛兮紛婦姑之
勃發愛欲生而惡欲死兮甘日昧而心迷徒拘拘於
分殊兮若不耕而求穫嗟我生之困蒙兮仰前訓而
尋繹內潛求於方寸兮外以察夫飛躍用雖費而孔

彰兮體則隱而未現苟玩費而知隱兮信厥微之莫
顯然允蹈之實難兮恐斯言之不踐肆敷陳而作歌
兮庶有裨於觀省歌曰陰根乎動陽本乎靜動靜一
體孰分二儀形資黃矩氣始玄規乾坤異用孰貫乎
一一故神妙兩故化物無涵妙有有著真無道非器
外理與物俱敦化無窮川流不息孰尸其機嗚呼太
極

畫前有易賦

繫太虛之寥廓兮運妙有而不測諒厥虛之不虛兮
理假象而昭晰滌畫前而冥思兮覩自然之變易邈
鴻蒙之肇剖兮定尊卑於乾坤包六子而爲蘊兮拓

二儀而爲門升爲雲而降爲泉兮驗通氣於山澤動
莫疾而撓莫舒兮鼓風雷而相薄懸兩曜而著明兮
水與火其不相射大而覆載之器兮示易簡於玄黃
細而鳥獸之文兮亦粲然而成章形無形於有形兮
理何隱而不彰無聲無臭是易之實體兮絕思慮於
太極一動一靜是易之妙用兮設機關於闔闢位最
靈於兩間兮誕彌縫其罅隙固三才之自備兮奚有
待於卦畫嗟茲易之前無始後無終兮孰厥本之能
覩夫孰知一草與一木豈莫非至理之所寓彼河中
之負圖兮亦此易之鏡象仰可觀兮俯可察何必數
天參而地兩健立剛兮順立柔何必著陰偶而陽奇

噫本然之易道兮炳垂象兮若茲然仁智各隨所見
兮失全體而昧斯矧百姓之蚩蚩兮羌日用而不知
肆聖人運以獨智兮極鉤深而闡幽爰立象而盡意
兮理自此而可求胡易學之漸晦兮惟彖爻之是拘
捨筌蹄而得魚兔兮竊有取於堯夫冥搜乎無易之
易兮玩心乎不物之物詠性情而播妙兮發前聖之
未發嗟我生後千載兮心古人之方寸悟真源之可
滌兮知守株之自困假永言而示志兮瀆弄丸之餘
論歌曰天地之易不待庖羲象兮至顯理兮至微八
卦既畫聿洩玄機滔滔逐末達本者稀安樂窩空吾
誰與歸無隱乎爾魚躍鸞飛

次王

天使

敬民

箕子廟賦韻

正序○壬午

平壤是箕子故都立廟妥靈春秋誌祀而西華是
 箕子始封之地亦有祠揭虔無間海內外焉 皇
 明萬曆十年冬給事中徹吾王先生奉 命宣詔
 于我國先生是西華人少時鍊玉于洪範堂紬繹
 疇範之旨薰沐仁聖之澤素矣今於萬里之外適
 到箕子之邦瞻仰廟貌徘徊興感遂賦陳其事一
 筆轉環不加點綴而辭富旨遠尊賢感古之意溢
 於言表况我東人受聖師罔極之恩遺風舊俗髣
 髴猶昨其可無辭以揚休烈乎茲敢不揆荒拙次
 韻以呈

夫何明宮之岌業兮耀朝暉而色鮮肅將禮而敷社
 兮滌人文之始宣昔玄鳥之啓商兮迄帝乙而祚延
 咸明德而慎罰兮君六七兮聖賢何期獨夫之恃命
 兮奪君子兮道遭結怨毒兮謂無傷曾不念獲戾于
 上天噫太師遭此明夷兮抱艱貞而彌堅豈不知反
 覆而熟諫兮恐我辟之彰愆豈不知高逝而行遜兮
 憫靈修兮誰憐肆內明而外晦兮甘隱忍而為奴炳
 丹心兮獻于先王勗自靖兮之死不渝如林之衆一
 散于牧野兮羌自絕兮云何吁覽武烈于湯有光兮
 不授法而何圖諄諄洪範之既陳兮前後聖兮一符
 夫孰知八百之姬業兮寔肇基於嘉謨念周德是天

所輔兮民相慶於來蘇顧余志罔爲臣僕兮指九天
而爲孚一葦兮泛泛渡海敢辭夫投荒而迹孤王乃
敬賢而表忠兮不拂乎夫子之所趨畫朝鮮而建國
兮夫惟不臣之故也君子居兮何陋葢殊域兮不忍
舍介鱗兮易以衣裳蚩蚩兮繩以法度政以德兮化
遠罄海隅兮歸附撫檀君之幅員兮教八條兮勤諭
煥禮樂兮軼華夏民至今猶受惠甚燭龍之照昏兮
俛大寐之得寤世縣曆兮千祀德厚流光兮其誰與
仇曰皇華起敬於祠宇兮珮鏘鳴兮琳璆云是箕城
之秀士兮夙涵沫兮澤流西華平壤不知其幾千里
兮想彼此兮思悠悠神之格兮如水在地奚必此都

之獨畱遺氓瞻玉節而增惻兮相排擁乎道周酌瓊
漿兮椒醕採蘋蘩兮爲羞靈風至而颯然兮髣髴兮
迎我聖魂陟降兮焄蒿悽愴豈無不亡者猶存嗟漢
使之揭誠兮導邦人以益虔末世相傳而不忘兮尤
有感於敷陳而直言亂曰噫嗟嗟君子守身之經兮
樂行憂違猗歟夫子之達權兮孰敢望乎依俦欲鑽
仰兮何由在極深兮研幾

詩

花石亭

八歲作

林亭秋已晚騷客意無窮遠岫連天碧霜楓向日紅
山吐孤輪月江含萬里風塞鴻何處去聲斷暮雲中

偶興二首

癸丑

步屨松林下開樽空翠來
雨昏鴻外岫溪漱石邊苔
地勢千山小泉源萬壑分
高人獨昏曉迎送只閒雲

出東門

甲寅

乾坤孰開闢日月誰磨洗
山河既融結寒暑更相遞
吾人處萬類知識最爲巨
胡爲類匏瓜戚戚迷處所
八荒九州閒優游何所阻
春山千里外策杖吾將去
伊誰從我者薄暮空延佇

途中

炊煙一抹午雞鳴幽人策杖臨溪水
山家四月春不盡夾籬菜花紛青紫
微行時有採桑女南畝頗看饁

舉趾斜陽疎雨入孤邨牧笛樵歌相應起
柴門剝啄喚主人老翁見我如相喜
松牀竹席極瀟灑不知人間羅綺侈
翁言閱世不記年勞佚悲歡皆染指
人情蟬翼苦無常刀劒藏於言笑裏
我今持拙保餘年本來無譽誰爲毀
逢君欲問蝸角事時運幾泰還幾否
莫將名字播紅塵我是當年被衣子
旋將雞黍飽我飢伴宿虛齋談性理
奇言險語或不經下視莊列如螻蟻
明朝睡覺寂無人只見空庭遺脫蹤

望寶蓋山

寶蓋山容入望中洞門應有白雲封
遙知隱者饒春睡松下殘碁斂未終

山中

採藥忽迷路千峯秋葉裏山僧汲水歸林末茶煙起

楓嶽贈小菴老僧

并序

余之游楓嶽也一日獨步深洞中數里許得一小菴有老僧被袈裟正坐見我不起亦無一語周視菴中了無他物廚不炊爨亦有日矣余問曰在此何爲僧笑而不答又問食何物以療飢僧指松曰此我糧也余欲試其辯問曰孔子釋伽孰爲聖人僧曰措大莫瞞老僧余曰浮屠是夷狄之教不可施於中國僧曰舜東夷之人也文王西夷之人也此亦夷狄耶余曰佛家妙處不出吾儒何必棄儒

求釋乎僧曰儒家亦有卽心卽佛之語乎余曰孟子道性善言必稱堯舜何異於卽心卽佛但吾儒見得實僧不肯良久乃曰非色非空何等語也余曰此亦前境也僧哂之余乃曰鳶飛戾天魚躍于淵此則色耶空耶僧曰非色非空是真如體也豈此詩之足比余笑曰既有言說便是境界何謂體也若然則儒家妙處不可言傳而佛氏之道不在文字外也僧愕然執我手曰子非俗儒也爲我賦詩以釋鳶魚之句余乃書一絕僧覽後收入袖中轉身向壁余亦出洞恍然不知其何如人也後三日再往則小菴依舊僧已去矣

魚躍鳶飛上下同，這般非色亦非空。等閒一笑看身世，獨立斜陽萬木中。

萬瀑洞

石逕高低入洞門，洞中飛瀑怒雷奔。巖橫萬古難消雪，山聳千秋不散雲。獅子峯前披翠霧，火龍淵上坐黃昏。夜投普德禪菴宿，鶴唳猿啼攪夢魂。

楓嶽記所見

吾生賦性愛山水，策杖東遊雙蠟屐。世事都歸掉頭中，只訪名山向楓嶽。初沿石川得小逕，漸見鳥道通山麓。林間有寺知不遠，青煙起處疎鐘落。行行日暮路窮時，蒼檜蕭森露朱閣。僧房寄臥不成夢，隔窓終

夜聞飛瀑半明粥，熟木魚動一庭緇。髡羅千百我時出門，問前途有僧指點。青山北，寒衣披草不辭勞。欲使清風駕兩腋，藤蔓蔽日入洞深。石角拘衣知路窄，直上高峯始豁然。萬境森羅收不得，風聲水響浩難分。幾道飛泉喧衆壑，擡頭東望眼力盡。茫茫大洋連天碧，逍遙便作物外人。洗盡曾中塵萬斛，忽驚蘭若在林端。往扣禪扉聲剝啄，空庭寥寂一鳥鳴。門外溪清難濯足，更尋幽逕傍危巖。引手攀蘿屢敲側，崎嶇上下得小菴。四面芳草無人迹，峯巒削立怪欲飛。雪色嗟峩迥無極，青天去地不盈尺。頭上星辰手可摘，雲來雲去何所見。階下千峯青又白，雷聲殷殷俯可

聽知是人閒風雨作排門忽見入定僧鍊得身形瘦
如鶴欣然見我不相語淨埽禪牀畱我宿凌晨蹴我
見出日驚起開窓遙送日東方盡入紅錦中不辨朝
霞與海色須臾火輪涌扶桑照破乾坤一夜黑僧言
此地最奇絕世間何翅仙凡隔嗟余俗緣磨不盡不
能棲此全吾樂他年勝遊如可續寄語山靈須記憶

松蘿菴

蘭若干年境松蘿一逕深僧歸喬木外鳥度暮山陰
衣濕雲生壁窓明月上岑夜來羣籟靜泉石奏瑤琴

楓嶽登九井看日出

嗟峩雪峯幾千仞鳥道人行白雲外青藜戛上翠嶺

壁一
作壁

中兩眼漸覺東丘溢夜投禪室徹曉坐時聽笙簫來
上界金雞一鳴登絕頂萬境熹微天尚昧須臾火光
漲天地不辨滄波與曉靄朱輪轉上數竿高一朶彩
雲如傘蓋青紅漸分水與天極目始知東海大扶桑
賜谷渺何處欲看出處知無奈秦皇夸父等小兒千
載令人起一喟

與山人普應下山至豐巖李廣文之元家宿草

堂乙卯

學道卽無著隨緣到處遊暫辭青鶴洞來玩白鷗洲
身世雲千里乾坤海一頭草堂聊寄宿梅月是風流

山中四詠

樹影初濃夏日遲晚風生自拂雲枝幽人睡罷披襟
起徹骨清涼只自知風

萬里無雲一碧天廣寒宮出翠微巔世人只見盈還
缺不識冰輪夜夜圓月

晝夜穿雲不暫休始知源派兩悠悠試看河海千層
浪出自幽泉一帶流水

飛入青山幾許深洞中猿鶴是知音何如得逐神龍
去慰却蒼生望雨心雲

偶成

得趣自忘憂吟詩不成句鄉關夢乍回木落秋江雨
向臨瀛題祥雲亭

秋風別楓嶽斜日到祥雲沙上千巖列松開一路分
殷雷波捲海疎篆鴈成羣秣馬催程發前山晚靄昏

燈下看書

何處人間有廣居百年身世是蘧廬初回海外游山
夢一盞青燈照古書

白川邊酌月

丙辰

衣濕三更露雲收一笛風開樽涼月下人在水晶宮

送李可謙遊頭流山

丁巳

頭流楓嶽可尋真誰脫區寰沒馬塵我昔白雲臺上
客君今青鶴洞中人吟鞭驛路春千里蠟屐山蹊月
一輪收拾煙霞知幾許錦囊從此貯清新

立馬羊腸回望伽倻山

立馬羊腸口雲回不見山慙慙碧溪水隨我出人間

神龍圖

戊午

造化苦無常壁上神龍涌雲奔六合昏鰲走三山動
眼奪日月明聲掀天地洶怒來一呀口吸盡尾閭孔
翻然駕霹靂却以風雨弄任公何足道龍伯亦應恐

次林石川

億齡韻

石川古遺士風雨生揮筆俊逸與清新公今合為一
興來百紙盡倏忽成卷帙小子才可愧不能窺堂室
一席得親炙何幸同時出生平不屈膝今日為公屈

寄呈石川

先生勇退臥菟裘算得閒居樂事優茶鼎火殘松籟
靜竹輿行穩橘林幽雲隨菴嶽尋眞屐月送魚川訪
客舟丘水遣懷多少作一篇能寄遠人不

次李承旨

文槎

默齋吟韻

活計從他百不諧樂天誰復歎時乖灰心南郭機初
息合喙莊生味轉佳玉軫曲中含古意雲窓睡裏夢
無懷雷聲淵默人難會莫道先生但守齋

詠四皓三首

見瓊言

自星山向臨瀛

客路春將半郵亭日欲斜征驢何處秣煙外有人家
過禮安謁退溪李先生

仍呈

一律

見瓊言

奉次退溪先生寄示韻二首

見瑣言

泛菊

為愛霜中菊金英摘滿觴清香添酒味秀色潤詩腸
元亮尋常採靈均造次嘗何如情話處詩酒兩逢場

贈山人智正

昔年流宕愛山水遠遊不得毛生脛竹杖芒鞋淡行
裝負笈相隨惟智正同穿白雲入楓嶽萬二千峯雪
相映搜奇探勝不暫休泉石膏肱天與病時時步履
碧海滄笑指鯨波一銅鏡踏盡關東一千里天機一
周回斗柄我別湖山塵日深師臥煙霞根境淨雨來
屈指過五年道人警咳無由聽南荒北極兩渺然爾

上醒
疑成

足來尋情轉盛我時偷閒臥古寺只將黃嬾窮晨暝
甕然可喜况故人客裏相逢斯亦命瓶錫隨緣休便
休禪窓連榻歡難罄未樓步履暝色來碧巘縱日春
糴靚尋花傍水動相隨蒼逕巖扉行不定時揮玉麈
辨異同談邊矛盾紛縱橫憐師惑志未曾變不遵大
路求捷徑法輪心印本無徵三界六道誰汝證吾家
自有真樂地不絕外物能養性求高立異摠非中反
身而誠可醒聖師聞此語始聽冰漸似醉夢人呼醒
低頭請讀子思書欲以墨名儒其行頭流雄鎮蟠地
軸路指火維幽且負師今巡莫千萬峯競秀爭流幾
吟詠臨流不堪懷抱惡贈言何待殷勤請但恨鉛槧

廢已久詩成苦乏詞鋒勁

龜峯下訪李司評之蕃○己未

峽裏仙區別有天危峯如畫蘸晴川
人間歧路波聲外林下衙門秀色邊
枕水巖平當臥榻宿簷雲細雜
茶煙客來剩作清宵話坐待寒蟾上翠巔

龜峯草堂風雨徹曉

客夢頻驚地籟號打窓秋葉亂蕭騷
不知一夜寒江雨減却龜峯幾尺高

降福寺石佛庚申

臭腐神奇非異物畫殿荒草孰爲真
那知路傍一片石却引無窮祈福人

次靈熙軸韻

一錫飄然幾處飛白雲猶惹出山衣
煙邨訪客情多少細雨松門獨自歸

催詩雨

雲鎖青山半吐含驀然飛雨灑西南
何時最見催詩意荷上明珠走雨三

詠菊

佳色擬時憐靖節落英餐處惜靈均
秋霜一著東籬畔只有此花無此人

入玉溪洞

行傍清溪步步遲奇巖懸瀑雪花飛
羽人應在水窮

東谷全書 詩上
處路斷雲深惆悵歸

宿鳥嶺

登登涉險政斜暉小店依山汲路微谷鳥避風尋樾
去邨童踏雪拾樵歸羸驂伏櫪啖枯草倦僕燃松熨
冷衣夜久不眠羣籟靜漸看霜月透柴扉

趙公保

擴

家偕李汝受

山海

諸公飲

月上林梢萬境清纖雲不起玉盤盈若爲除却山河
影添得今宵分外明

與諸公會

酒熟小桃發論詩聚故人瓶含春意思花挹雪精神
病怯杯心凸慵驚句法新斯游也不惡拂盡染衣塵

與汝受往李景魯

希參

家詠懷

曉色生虛閣熹微窓半明深林一鳥語殘月幾人行
夜話深情洽朝分別袖輕從今歡會數對榻可忘形

挽黃孤山

耆老

醉墨甘觴五十年却將豪氣困沈緜衣翻洛下千家
酒筆染人間萬竈煙梅塢有春塊已返鶴汀無主月
空圓緘辭一哭君知否立向南風淚似泉

坡山奉呈聽松成先生

詩琛

靜裏生涯足人間事不聞草封趨俗路簷宿下山雲
動靜朝看易行藏晝掩門客來欣所得清話破吾昏
至夜書懷

子半一陽動天心妙難議若識無中有雷聲殷大地
中宵點新火耿耿坐不寐及此夜氣清默念玄機祕
向來剝牀膚萬彙困凋瘁春回九泉底萌蘖含生意
一氣互動靜闔闢誰汝使感彼天運復省心還惴惴
噫我參三極精氣秀萬類明德皎日月斯皇天所昇
妄念蝕本明始微終轉熾山木困斧斤天真汨私偽
二十五年間沈迷夢中醉追思昨者非令人發驚悸
我今痛自誓昊天應聽視色爲伐性斧胡爲畱汝思
若使敬爲主染心安所自名乃實之賓莫以文爲事
用功於實地繡繪何暇嗜家貧親已老念之常不置
君子養以善三牲不足比苟能素其位所居常坦易

外貌不莊肅怠慢於斯萃散坐與空談畢竟非善戲
衣冠必整飭言語慎勿費中心不專一邪思所窺覷
擾擾起復滅火炎兼馬駛截斷前後際卓立恒勿貳
慎獨與不怠聖謨斯爲至參前復倚衡不可須臾離
處心廓如天屋漏可無愧任重且道遠要以志爲帥
九仞今正始莫使虧一篑冥觀天地化至健功乃施
爲人不法此有身乃自棄但使泥塵盡水鏡元無累

送李士亭

之

還開天

難兄難弟摠清流選勝移家占一區活計蕭條車不
滿塵紛閫絕地偏幽紫荆陰裏三間足黃犢坡邊二
頃優何日得諧攜手約春江佇立送扁舟

送山人敬悅之香山

太白橫西未了青高標欲與雪山爭層雲歸鳥空神
契目斷春鴻送雨行

上山洞

入洞山容別沿流境漸新林深不受暑泉語解留人
苔石承鞋滑雲厓陰席親清詩吟未了慙愧向紅塵

次崔主簿

益齡

漁翁韻

漁翁荷網曉開扉綠漲春江可染衣款乃數聲煙雨
外暗中猶記釣船歸

贈參寥上人二首

癸亥

不領叢林為養真

參寥曾首禪科差稱
若任持不赴而遁

名韁豈到上根

人一千里外萍蓬客四十年來雲水身觀貌便知春

米熟接機深訝箭鋒新猶嫌未吐煙霞語洗却吳儂

兩眼塵

寥不作詩
故及之

高人冷笑世人忙一視衡門與畫堂已判六根歸寂

滅應教五濁自清涼雲行嶺外難尋迹月印波心豈

捉光何似吾家真樂地不求虛遠履平常

平丘驛遇雨

疾雷洩驟雨挾風驅祝融萬里炎威霽千山水墨濃

哭聽松先生

甲子

嶽精偏毓碩人頤坐使儒林仰羽儀雲翼未瞻搏北
極霜英還惜老東籬清和風月流聲影上下溪山入

燕貽滴盡平生壯夫淚非斯為慟為伊誰

釋褐登龍門 應製

商明垂照海東天鳳曆開元十九年整頓二儀調玉
燭昭回五緯聚奎躔熙熙物園春臺樂濟濟人歌早
麓篇雨施雲行亨品彙川流敦化察魚鳶經邦既使
彌綸弼束帛芻求仄陋賢沾玉摠看朝象魏考樂誰
復老林泉孤臣早綴窮民籍下學徒研蠹簡編詩廢
蓼莪風撼樹家無庾釜硯為田艱關活計長炊玉瀨
落虛名不直錢觀國縱充多士列立身難致五雲邊
橫經愧欠談天舌秉筆慙無落紙煙三級幾年勞點
額九霄今日始登仙攀龍大似乘軒鶴釋褐真同脫

殼蟬存沒被榮悲感集親朋送喜慶聲連螢窓食藜
纔收效雲路膏車敢著鞭素志豈無江海趣丹忱只
向袞龍懸忘身欲試鉛刀割守拙何須檮櫟全別殿
秋風搖佩玉故山煙月自啼鶻包瓜寵洽蓬門側貫
石誠橫繡戶前干祿肯懷求舖啜補天深願效埃涓
兢兢况若臨深谷戰戰茫如涉大川闔闔可能呈肺
腑臯音冀得徹穹玄勛華濟衆猶為病文命憂民不
自憐黃屋正推恩澤廣蒼生尙被苦愁纏如傷倘竭
周文惠解慍應調帝舜絃雨露普霑圭華戶光明莫
照綺羅筵盈成最是无疆恤廣運宜追不息乾前後
道如符節合流行化速置郵傳蒲蘆德教三韓浹瓜

賦休祥萬祀縣願效康衢歌帝則頌聲奚待筆如椽

李伯生純仁趙公保尹仲說箕崔立之豈崔嘉

運慶昌及趙兄大男季獻與余共泛舟于楊花

渡傍仙遊島余將有西行故諸君出餞也嘉運

出城時有詩因次韻

載酒撐船水一隈青山隱向海門開汀花岸草與煙

遠別後知君愁更來

題烏原驛三首

東溟萬頃波摠入吟眸裏不見採魚船寧分天與水

薄暮獨支頤樵歌起何處輕風動竹林似與幽人語

久別蓬萊島來游海上山題詩聊戲耳名字落人間

作入

陽德縣次韻乙丑○秋以黃賜木
敬差官往平安道

乘昏投古縣暝雲生幽谷霏霏迄未收作雨鳴板屋

凭欄四面山松檜鬱翠楚聞說長官清居民雜麋鹿

清邊忽生戎倉卒希秦俗萬事付滔滔深憂蔡謨獨

入夜耿不寐有懷人如玉沈沈萬境空半壁搖殘燭

送尹子固根壽赴京丙寅

歸期非關豈傷神自有幽情未解鬢喬木長沙朝

帝路淡煙芳草渡江人雙行且忍憂時淚萬里毋輕

許國身聞說燕山多志士憑君觀市訪沈淪

灞橋晴雪

風捲填空絮虛簷斷夜聲幽懷牽灞水奇畜出柴荆

野曠寒雲斂天高霽景明瓊沙彌世界玉堞擁神京
一望川原合從知岸谷平山驚銀荀秀橋訝白霓橫
遠店煙飛縷初陽樹掛鉅羣器收靜境人迹絕長程
冷逼肩常聳光搖眼奪精石間梅寂歷冰底水琮瑋
策蹇欣杯散經林惜藥輕優游添逸趣舒暢騁詩情
濩落難諧俗浮休任此生疎才空抱瑟何路試和羹
暮色俄迷遠寒鴉亦喜晴往來俱自在心迹一般清
世事輪吟料生涯付散行惟耽驢背樂豈顧代間名
酒旆輕初舞樵蹊細欲成黃昏興不盡歸路踏彭鏗

天馬

月課

房星降精孕龍胎霧鬣風鬃奮西野霜蹄一舉涉流

沙萬里騰驤汗始赭迥立長嘶志無前奔霄絕地風
斯下漢家四葉懾九夷域外異物來華夏當時不獨
月窟產渥洼神駒絕瀟灑君王好馬馬自至亦如好
賢來賢者蘭筋虎文世豈乏自是權奇知者寡 聖
明今日築金臺小臣作詩歌天馬

臨河歎

丁卯

行行復行行曰至河水潯河水去洋洋黑波千丈深
欲濟舟楫闕斜陽空俯臨吾道竟何之天意杳難尋
麟鳳不擇所何殊凡獸禽得失命也夫歸歟誰我禁
美哉彼河水實獲仲尼心

明宗大王挽

日角眞天表聰明自弄璋乾坤鐘秀氣雲漢煥文章
五讓龍飛代重華舜協唐滄溟澄霽浪黃道赫垂光
每切無虞戒恒憂罔念狂景賢搜澗谷思孝謹烝嘗
道可通三極天胡闕百祥紫宸縣喪患玄命困悲
傷黎首方嵩祝雲駮已帝鄉哀聲掀鰈域慘色接扶
桑琴殿衣裳在喬山草樹荒攀髯更無路臨穴愧三
良

次松都大平館華使韻十首

立馬荒城欲暮天綠蕪喬木鎖寒煙雲根只是前朝
物碧砌依山幾百年

鵠山橫翠鬱嵯峨山下王城勝槩多驛樹依依連薊

北仙槎渺渺自銀河

山河依舊市朝新一代衣冠總是塵士女卽今迎玉
節笙歌挾路大平人

吟鞭斜日過名區臺殿遺基碧草蕪楊柳陰街車馬
咽繁華祇爲近新都

客懷惆悵立黃昏故堞淒涼野雀喧滿月臺邊荒薺
合當時輦路已無痕

雨歇山城樹色青平郊一抹淡煙橫皇華四牡從天
下王事驅馳不計程

松嶽天磨勢競嶢浮空秀色映星軺迎賓館裏羣巖
靜明月何人弄玉簫

水落巖邊細溜清
弄晴山鳥自呼鳴
峯陰欲暝樵歌絕
手撫喬松萬古情

舊京風色見來佳
萬室鱗鱗枕翠崖
倚檻忽驚塵慮斷
煙霏日夕入虛齋

王家卜曆半千春
統一奇功已作塵
自是孱孫迷祖誠
還教後辟鑿前人

箕子殿

戊辰

麥秀悲殷祚彝倫
敘我東轉深微禹
歎祇有變夷功闕
殿苔昏畫宏庭柳
拂空井田今有址
安得挽遺風

鴨江船上別義州牧伯郭景高

嶧

長城塞雨收
萬里煙江闊
綠樽送將歸
蘭舟棹歌發

主人敘幽情
遲回不忍別
下船便異域
烏紗草閒沒
燕山渺何許
夕陽明一髮

次睦思可

詹

杏山客館韻

露砌蟲音細
風櫺月影多
難憑清夜夢
歸釣鏡湖波

次思可望

長城韻

南臨鯨海北雲峯
客路透遲勝槩中
胡馬每嘶幽薊草
長城萬里為誰雄

次思可

聞諸公登城觀軍容韻

沙場一夕起妖氛
報道胡塵漲塞雲
障上豎旗喧鼓角
將軍只解守城門

撫寧縣遇回還謝

恩使丁公姜公李侯敘懷

卽別

西行四千里舉目無相識回風起馬首但見塵沙撲
有客自天來班荆手一握欣悵語未能驅駒促行色
那堪爲客日送人歸故國寸心含遠愁雲暗平蕪綠
家人入孤夢一別無消息憑君報平安以慰長相憶

次思可三叉河韻

客路三千里鄉愁十二時雲煙迷戍遠舟楫渡河遲
獨鳥去超忽蹇驢行邈迤燕山望不極還旆杳難期
次思可送別進賀使先行韻

萬里秋風得得行客懷何事轉淒清三河分却東飛
鞞疎雨寒燈獨夜情

通州道中

晚雨霑沙路秋風渡石橋輪蹄紛接武煙火藹連郊
障塞青山迴沿河碧樹遙 神京饒壯觀聊慰客塊
銷

次思可朝 天韻

齋心瞻拜 九重天一朶紅雲咫尺前日照眼迷仙
仗影風回衣惹御鑪煙金門乍出星河迴玉學初傾
雨露宣故國渺然遼海外重陪鸞鷲更何年

次金元瑞玉河吟韻

匹馬燕山萬里行故園東望水雲平三秋旅鴈隨陽
過一壁殘燈伴客明斜月入簷飛玉露疎鐘度閣閉

作韻一

金城愁邊桂萼空昏曉何日刀頭放遠情

次元瑞卽事韻

玉河秋思問如何燕趙曾聞志士多鬱鬱 帝居山
北峙悠悠世事水東波塵埃柴市行人鬧風雨金臺
獨鳥過一鎖館門深似海長虹萬丈氣難磨

次思可登天壇韻

肅肅宏庭碧樹高五雲臺殿勢雄豪園丘盛禮無由
覩管裏窺斑恨我曹

在燕京見仲氏詩次韻

鶴禁逐令辰祥光動八區扶桑使節遙寒暑變須臾
欽達我 王誠回轅自清都鵠原夢寐煩彼此情豈

殊會合指日待莫費長嗟吁

燕京道中寄舍弟

去路三千四百里歸路二千四百里行行六千八百
里月魄看看六回死我弟邨莊更千里况是別日前
乎此故國人來不見書搔首看雲遼海淡孤城木鐸
不成眠單于獵火連郊紫漢陽風雪子來否對牀話
此真夢耳只願相逢有新得論詩論學令人起

押馬官朴公挽

江頭物色正依依萬里靈輜掩素幃白雪黃雲遼塞
路斷腸同往不同歸

未平東郊次思可韻

時有獲
子聲息

客程杳何指駢駢馬首東朔風捲地來日入黃埃中
誰管北門鎗邊民愁犬戎 聖神方遠猷四海車書
同安得霍驃騎折彼天驕鋒

次思可留前屯衛韻

絕塞孤城暗朔雲邊聲空使客邐迤 天朝虎旅紛
如雨却畏陰山犬豕羣 備禦神仲光連日閉門不許發行故云

清節祠

牧野漂杵天地變二賢隻手擎不周鎬京商邑兩丘
墟有廟俯瞰澄川流入門瞻拜凜生毛萬古清風吹
不休息恩未將椒桂奠出城惆悵荒郊秋

龍灣酒席贈主倅郭景高兼示同行友人

薊樹遼雲道路長歸心一日抵三霜清樽促膝龍灣
館此地分明是故鄉

鄭季涵 澈奉使湖南余有關東之行臨別賦贈

石友分千里幽懷付一嗟東關迷雪路南極渺星槎
芳草佳期闊寒梅晚影斜堪憐今夜月相送到天涯

再游五臺山石澗踏雪 己巳

四月山中踏雪崖天風吹袂空中舉羣峯擁翠寂無
聲松下幽泉向人語

遊南臺西臺中臺宿于上院

洞壑媚新晴巖流清有聲五臺引興深苔逕芒鞋輕
攀蘿凌絕頂白雲生翠屏俯覽衆山小浩浩煙樹平

冷冷石竇泉

字簡水在西臺水精菴

一飲遺世情禪房坐蒲團

灑落塊夢清晨磬發深省澹澹吾何營

題老僧詩軸

僧光而耳聾

蟻動與牛鬪寥寥同一聲誰知淵默處殷地海濤轟
有僧惟命求詩甚苦走書以贈

禪形鶴共矐行脚雲無迹胡為淡泊僧却有求詩癖

金剛淵己巳

辜負名山二十年重來物色摠依然寒巖倚遍幽情
集數道飛泉落晚淵

重游月精寺

客路蕭蕭萬木中夕陽疎磬出琳宮居僧莫問重來

意默對巖流世事空

將入內山遇雨

解綬歸來萬事輕五臺奇勝最關情山靈灑雨非嫌
客添却林泉分外清

贈山人

五臺山下月精寺門外清溪不息流可笑衲僧迷實
相只將無字謾推求

次山人詩軸韻

此道元一本人心有去來如何入他逕十年頭不回
霜落千山瘦風和百卉開玄機宜默識妙運孰相催

題處均軸

青瑣空餘夢裏蹤
海山無事不從容
禪窓雪夜疎鐘
歇萬木蕭蕭月影中

書安定樓

長路行方倦危樓眼忽明
暝煙催鳥噪松影助風清
雨意頻愁客苔痕已占庭
倚欄成小睡魂夢繞江城
雲交驛

積雨瀨山路終朝行石梁人愁荒店遠馬愛綠坪長
十曝三庚熱千金一樹涼不知為客苦都為近湖鄉
無盡亭下乘月艇

江天霽景爽如秋晚泛蘭舟碧玉流雲影月光迷上
下美人西望思悠悠

沿流坐石研墨于巖上題詩記事

坐遍奇巖出洞遲玲瓏碧澗動相隨
遊人只把清漪弄絕頂真源世不知

重遊楓嶽將入內山遇雨

雲雨暗幽林山堂轉清絕茶罷一事無
詩談雜禪說明朝欲尋勝陰靄夜應歇

贈山人雪衣

石與水相激萬壑清雷鳴借問衣上人
水聲還石聲爾若下一語便了物我情

新晴遊通德山

幽人長夏不窺園為愛新晴出郭門
百派水交川勢

關千章樹含驛程昏芳樽碧藉山頭草落照紅拖海
外雲風弄笛聲挑客興會須畱待月紛紛

書院別諸友

煙鎖長川雨滿衣碧空吟斷送人歸明朝別恨知何
許萬木參天一逕微

原城酒泉縣江樓夜坐

紫綸飛下 聖恩深補袞非才愧此心虛閣夢回江
雨細孤螢明滅度西林

蓮池島上小閣崔監司景肅題設酌

碧沼過疎雨新涼隨雨生荷香樽外細林響暝來清
銀燭樓臺影秋風去住情孤帆明日發雉嶽望中青

次李達韻

泠泠斜雨浸庭莎小閣開樽別意多吟罷碧雲燒燭
短秋聲無賴集池荷

復用前韻答景肅

輕煙羃柳露凝莎霽景初澄嶽色多別後夢魂何處
著曲樓新月小池荷

舟中寄景肅用前韻

秋水溶溶沒錦莎短篷依樹暮蟬多憑虛樓上今宵
月誰伴清吟弄碧荷

次韻別李達

鐘鳴巖下寺煙鎖渚邊沙孤棹客程遠亂山秋意多

樹深喧鳥語江迥斷漁歌珍重西潭子高吟泝碧波

過魯谷悼表叔洪上舍浩贈表兄士俊

溪壑渾依舊溪翁事已非入門愁獨立登榻淚雙垂
纖月低寒樹幽泉繞短籬吾兄幸無恙終孝慰慈闈
過上山洞忽憶舊事因感有作

客意忽惆悵山陰催夕曛弟兄曾駐馬朋友亦隨羣
石澗鳴春水巖峯聳夏雲至今成舊迹羅逕獨黃昏
神勒寺東臺夜坐用汝受韻

夜靜江天霽月懸蟲音在草水禽眠騷人自是秋多
感松下寒巖坐悄然

將發神勒寺二首

蕭寺繫蘭舟秋風動林樾虛窓耿不眠雲翳寒江月
杳杳驪江波依依廣陵樹題罷碧雲殘輕帆落秋雨

過越溪棧宿邨舍有懷兄弟

歇馬滄洲上尋蹊畎澮閒孤邨依老樹細澗下荒灣
雨足連畦菜嵐收繞屋山別愁今轉極無境解吾顏

斗尾十詠

表叔韓正脩所居之地

我土惟九畹春逢一犁雨長鏡獨自鋤餘濕沾芒屨
不勞漢陰瓮香苗已滿圃藥圃春雨

黃花挾蒼苔此是幽人路寂無車馬迹褰衣散孤步
所思在空谷不憚行多露菊避秋露

燒痕得雨潤草深山逕微曳杖乘晚興入林歌采薇

谷口鎖暮煙盈筐應始歸早谷採薇

小溪起清漣我來山雨餘垂釣本無鉤一絲風卷舒
物我兩無間非魚亦知魚小溪釣魚

向晚菰岸鳴長江生片帆渺渺水程遙歸心指雲嵐
風利更須棹夕照沈危巖斗尾暮帆

英英復藹藹洞壑時爭吐凝為曉山陰布作春江雨
出入兩無心誰散還誰聚劍端朝雲

梅花本瑩然暎月疑成水霜雪助素豔清寒徹人髓
對此洗靈臺今宵無點滓梅梢明月

虛窓對竹塢當午來清風華胥夢初回體舒心和冲
願將一枕涼遍灑夏畦中竹塢清風

林巒媚晚晴子規響蒼壁問渠本無悲血淚誰為滴
啼罷忽飛去樹深山寂寂清晝杜宇

寒濤撼山齋響在雲霄外開門星月明雪上松如蓋
太虛本無聲何處生靈籟雪夜松籟

有僧求詩次退溪韻
五臺山上有禪龕石底筭筒水味甘早識此心元是

佛玉峯無竭不須參
次洪忍齋選淳熙院韻

松陰峯影滿軒涼泉語玲瓏下曲塘木脫猩紅山逕
瘦羹和錦帶客盤香

贈沈景混長源二首

山前得酒飲山光鳥碎花妍春晝長無限別愁今日
散松風吹耳勝簫簧

三月園林日氣和小庭芳草得春多君來正與良辰
遇一笑論詩興若何

題九拙菴上梁明府喜菴在嶺南是明府幽棲
之所自號九拙謂性拙貌拙言拙文拙射拙官
拙與朋友交拙為身謀拙為子孫計拙也

大朴散生巧拙乃物之初使君已聞道自修恒有餘
直性乘真率古貌又清疎有言實不華有文鬱而舒
觀德不主皮宦遊任乘除貧交淡若水屢空常晏如
子孫遺以安負郭無畬畝裝點此九拙作扁揭林居

一菴小如舟細逕直通閭土砌種節友峯翠蘸清渠
簷前蔓龍鬚柳下觀游魚逍遙岸烏紗野老牽衣裾
夕日暖山城嵐光落幽廬入室人語靜四壁盈圖書
俯仰生事足拙境樂只且聊將拙作郡愛民勞拮据
催科自考下四野樂耕鋤苦被赤子挽南望吟歸歟
江干訪散人嘆林子干旃薤水愧無箴木瓜挑瓊琚
何當陪杖屨一宿雲窓虛

栗谷先生全書卷之一

